

**UNITED
NATIONS**
United Nations
Interim
Administration
Mission
in Kosovo



NATIONS UNIES
Mission
d'Administration
Intérimaire des
Nations Unies au
Kosovo

PROVISIONAL INSTITUTIONS OF SELF GOVERNMENT

**KUVENDI I KOSOVËS
СКУПШТИНА КОСОВА
ASSEMBLY OF KOSOVO**

**TRANSKRIPTI
I SEANCËS PLENARE TË KUVENDIT TË KOSOVËS
TË MBAJTUR MË 5.4.2007**

**TRANSKRIPT
SA PLENARNE SEDNICE SKUPŠTINE KOSOVA,
ODRŽANE DANA 5.04.2007.GODINE**

PRILL - APRIL 2007

KRYETARI – Të nderuar të pranishëm. E hapi mbledhjen plenare të Kuvendit të Kosovës për të cilën propozoj këtë

R e n d d i t e

1. Fjala e hapjes e kryetarit të Kuvendit të Kosovës, Kolë Berisha,
2. Fjala e presidentit Fatmir Sejdiu dhe e anëtarëve të tjerë të Grupit të Unitetit.
3. Miratimi i Deklaratës së Kuvendit.

Në sallë aktualisht janë 101 deputetë.

Fjalën e kërkon Numan Baliq.

NUMAN BALIĆ – Prema predloženom dnevnom redu, prva tačka je uvodna reč. Druga tačka je rječ predsjednika Kosova i drugih članova grupe Jedinstva, odnosno kako bih ja nazvao takozvane grupe Jedinstva.

S obzirom da će se danas razmatrati jedna vrlo važna tema, hoću da govorim u ime zajednice, u ime dve zajednice najmanje, a takođe i u ime većinske zajednice koje sam godinama predstavljao, i hoću da znam i hocu da govorim o drugoj tački dnevnog reda. To je ono što sam hteo da kažem.

KRYETARI – Ju faleminderit.

I nderuari president i Kosovës dhe njihërit kryetar i Ekipit të Unitetit z. Sejdiu.

Të nderuar anëtarë të tjerë të Ekipit të Unitetit, kryeministër Çeku, z. Thaçi dhe z. Surroi, të nderuar ministra dhe zëvendësministra. Të respektuar deputetë të Kuvendit të Kosovës. Zonja dhe zotërinj.

Këshilli i Sigurimit i Kombeve të Bashkuara ka nisur procesin e diskutimit për statusin e Kosovës. I Dërguari Special i Kombeve të Bashkuara z. Ahtisari më 3 prill paraqiti dhe argumentoi raportin e tij për Kosovën. Ky është një moment i rëndësishëm dhe historik për Kosovën. Pardje, për herë të parë, në organin më të lartë të Kombeve të Bashkuara, në formë zyrtare u dëgjua fjala e presidentit të Kosovës z. Fatmir Sejdiu.

Me përkrahjen që iu dha pakos nga Shtetet e Bashkuara të Amerikës, nga Bashkimi Evropian, nga pjesë të tjera të botës dhe nga vetë Sekretari i Përgjithshëm z. Ban Ki Mun, jo vetëm që i jepet fund një procesi mjaft të rëndë dhe të mundimshëm të bisedimeve mbi 14 muajshe për statusin e Kosovës dhe këputen shpresat e atyre që ende ëndërrojnë në mundësitë e riciklimit të atyre bisedimeve, por edhe u shënua fillimi i fundit të njërës ndër epokat më të errëta në historinë e Kosovës dhe të popullit të saj. Kjo nënkupton fundin e robërisë dhe fillimin e realizimit të sigurt dhe shumë të shpejtë të aspiratave krejtësisht ligjore të këtij populli për të jetuar i lirë dhe sovran në trojet e veta. Secili prej nesh, tashmë jemi prononcuar për rëndësinë e këtij momenti, pra për fillimin e bisedimeve në Këshillin e Sigurimit lidhur me statusin e Kosovës.

Sot jemi mbledhur të deklarohe mi dhe si Kuvend lidhur me këtë fazë të procesit, siç kemi qenë vazhdimisht bashkë me Grupin e Unitetit gjatë këtyre muajve të bisedimeve e jemi

edhe sot kështu. Prandaj, të nderuar kolegë deputetë, kemi tubuar sot këtu në këtë seancë plenare që përmes miratimit

, besoj unanim të një deklaratë nga kjo sallë t'i dërgojmë botës një porosi të qartë për përkrahjen e planit të z. Ahtisari dhe falënderimin për punën e tij të madhe, si dhe për të gjithë ata që e përkrahin çështjen tonë. Mirëpo, para se ta lexojmë para jush tekstin e Deklaratës, të hartuar dhe të pranuar nga Ekipi i Unitetit dhe Kryesia e Kuvendit të Kosovës dhe nga shefat e grupeve parlamentare, ftoj Presidentin e Kosovës z. Fatmir Sejdiun që ta marrë fjalën.

Urdhëroni z. kryetar.

PRESIDENTI I KOSOVËS Z. FATMIR SEJDIU – I nderuari z. kryetar i Kuvendit, anëtarë të Kryesisë së Kuvendit, anëtarë të Ekipit të Unitetit, kryeministër, ministra të nderuar dhe ju deputetë.

Më lejoni që me pak fjalë t'ju drejtohem me një informacion të shkurtër lidhur me zhvillimet e fundit që kanë të bëjnë me seancën, përkatësisht çështjen e statusit politik të Kosovës, duke pasur parasysh seancën e Këshillit të Sigurimit të Organizatës së Kombeve të Bashkuara dhe adresimin në këtë seancë që është bërë nga ana e presidentit Ahtisari.

Siç jeni në dijeni pakoja e përgjithshme e presidentit Ahtisari e dorëzuar ditë më herët bashkë me dokumentin e rekomandimeve u është dhënë anëtarëve të Këshillit të Sigurimit më 26 mars 2007 dhe në proces normal të kapërcimit të procedurave lidhur me këtë pako presidenti Ahtisari më 3 prill, pra, para dy ditësh, ka paraqitur ekspozenë e tij. Mund të them para jush, ashtu siç besoj se keni informacione të plota se presidenti Ahtisari në plotëni ka argumentuar qëndrimin e tij të shprehur në këtë dokument të rëndësishëm për të ardhmen e Kosovës dhe si i tillë bashkë me pjesën e rekomandimeve politike parasheh pavarësinë e Kosovës me një mbikëqyrje ndërkombëtare dhe një prezencë civile ndërkombëtare me trupat e NATO-s për një periudhë të ardhshme. Në këtë takim të rëndësishëm të Këshillit të Sigurimit natyrisht se është prezantuar edhe një fjalë imja, e cila është transmetuar para anëtarëve të Këshillit të Sigurimit përmes Përfaqësuesit Special të Sekretarit të Përgjithshëm të Organizatës së Kombeve të Bashkuara në Kosovë, z. Ryker sikur që është dhënë edhe një diskutim i kryeministrit të Serbisë.

Ajo që mund të them se në këtë proces të rëndësishëm fillon procedimi i konkretizuar në pjesën e të gjitha procedurave të tjera të nevojshme për të ecur në drejtim të një vendimi konkret që duhet të marrë Këshilli i Sigurimit në mbështetje të këtij dokumenti të rëndësishëm.

Ne si Kosovë duke pasur parasysh gatishmërinë tonë, punën tonë dhe të gjithë vizionin që e kemi parashtruar gjatë bisedimeve të Vjenës, duke u përmbyllur ato më 10 marsi 2007 po kështu i kemi dhënë mbështetje këtij procesi, u kemi dhënë mbështetje qëndrimeve të shprehura në pakon e përgjithshme të presidentit Ahtisari edhe dokumentit të rekomandimeve, duke konsideruar si një dokument të balancuar, duke konsideruar si një dokument në të cilin kemi bërë kompromiset tona për hir të së ardhmes së Kosovës, për hir të së ardhmes së gjithë qytetarëve të saj, prandaj të nderuar deputetë do të ishte shumë e rëndësishme që në ditën e sotme Kuvendi i Kosovës të miratojë një dokument të ri, një deklaratë me të cilën mirëpret në tërësi raportin final të Dërguarit Special të Kombeve

të Bashkuara për statusin e Kosovës z. Ahtisari, të paraqitur, po ashtu, nga ana e Sekretarit të Përgjithshëm të Organizatës së Kombeve të Bashkuara, dokumentin e rekomandimeve se po ashtu do të jemi palë serioze në implementimin e tërësishëm të këtij dokumenti dhe të Rezolutës së supozuar që do të jetë , besoj, mbështetje e përgjithshme e vullnetit të popullit Kosovës dhe se do të presin dhe mirëpresin pa rezervë prezencën e re civile ndërkombëtare në Kosovë. Ne kemi bashkëpunuar si Grup i Unitetit me Kryesinë e Kuvendit, me shefat e grupeve parlamentare dhe se do të kemi një ide të përbashkët që Kuvendi vërtet të dalë me një tekst, me një deklaratë të përbashkët, unanime nga ky organ më i lartë përfaqësues i vendit për të mbështetur këtë proces të rëndësishëm që hap rrugën e mëtejme të procedimit edhe më të shpejtë edhe nga ana jonë dhe shpreh gatishmërinë tonë të bashkëpunimit në proceset e ardhshme për finalizimin e këtij procesi të madh që ka të bëjë me lirinë dhe me pavarësinë e vendit tonë.

Unë nuk kam ndonjë element tjetër të shtoj, vetëm të falënderoj me këtë rast Kuvendin e Kosovës për të gjitha angazhimet e veçanta që ka pasur gjatë gjithë procesit, për mbështetjen e madhe që i është dhënë Ekipit të Unitetit në punën e tij dhe gjithë Delegacionit të Kosovës dhe për mbështetjen e fuqishme të vizionit tonë të përbashkët dhe të paluhatshëm për të ardhmen e Kosovës, për pavarësinë e Kosovës. Ju faleminderit!

KRYETARI – Ju faleminderit z. president. Ftoj kryeministrin Çeku ta marrë fjalën.

KRYEMINISTRI, AGIM ÇEKU – I nderuari president, i nderuar kryetar i Kuvendit, kolegë nga Ekipi Negociator, të nderuar deputetë, të nderuar ministra.

Edhe unë si anëtar i Ekipit Negociator dhe si kryeministër në emrin tim dhe në emër të Qeverisë së Kosovës e mbështes aprovimin e një deklaratë të këtillë të prezantuar para këtij Kuvendi dhe ftoj deputetët e Kuvendit që ta mbështesin dhe ta votojnë një deklaratë të tillë.

Qeveria beson se dokumenti i Ahtisarit ofron një zgjidhje të drejtë për Kosovën, Qeveria është e bindur se propozimi i Ahtisarit siguron balancën në mes të vullnetit të popullit tonë për pavarësi dhe kërkesave të pakicave për integrim dhe zhvillimi në shtetin e ri të Kosovës.

Ky dokument pra garanton krijimin e shtetit të Kosovës dhe garanton integritetin territorial të Kosovës.

Duke e mbështetur këtë dokument ne do t'i japim mbështetje punës së Ekipit Negociator dhe gjithë infrastrukturës njerëzore të përfshirë në këtë proces për punën që e ka bërë në përfaqësimin sa më besnik të interesave të popullit të Kosovës në bisedimet mbi njëvjeçare të bëra me ndërmjetësuesit ndërkombëtarë. Akti juaj i sotëm do të ishte konfirmim i fuqishëm i partneritetit tonë me bashkësinë ndërkombëtare gjatë 8 viteve të fundit, por edhe në të ardhmen. Pavarësisht nga dallimet politike që kemi, ne kemi kultivuar një vlerë të jashtëzakonshme dhe esenciale për të ardhmen e shtetit të ri, unitetin për çështje madhore në interes kombëtar. Është e rëndësishme për Kosovën se procesin në të cilin hyjmë bashkërisht të na gjejë kështu bashkërisht edhe në fund të tij. Në rrafshin global procesi i pavarësimit të Kosovës është fitore e konsensusit ndaj politikës së koncesioneve, fitore e arsyes së shëndoshë ndaj emocioneve të verbëra politike, fitore e së drejtës së popujve për liri dhe pretendimeve të vjetruara mbi territorin. Ne nuk kemi qenë të vetëm, gjatë gjithë këtyre viteve kemi pasur mbështetje të

aleatëve dhe miqve tanë të Shteteve të Bashkuara të Amerikës, Britanisë së Madhe dhe vendeve të tjera evropiane.

Me këtë rast edhe unë në emër të Qeverisë dua t'i shpreh mirënjohje për punën e madhe që kanë bërë vendet e Grupit të Kontaktit, UNOSEKU në tërësi dhe në veçanti presidenti Marti Ahtisari.

Pavarësia që presim të finalizohet së shpejti nuk është në fakt fundi i procesit, ajo është fillimi i një rrugëtimi të ri, vizioni ynë parasheh integrimin e Kosovës në Unionin Evropian dhe në NATO.

Në fund duke ju ftuar që t'i jepni përkrahjen tuaj procesit përmes aprovimit të kësaj deklarate të sotme, ju ftoj që të vazhdojmë të mbetemi unikë ashtu si edhe deri më tani. Ju faleminderit.

KRYETARI – Ju faleminderit. Fjalën e ka anëtari tjetër i Grupit të Unitetit z. Thaçi.

HASHIM THAÇI – I nderuari z. kryetar i Kosovës, kryetar i Parlamentit, kryeministër, z. Surroi, të nderuar ministra dhe ju deputetë, të nderuar mysafirë.

Takimi i sotëm nuk është i rastësishëm, është një procesi i gjatë, prandaj edhe ne të gjithë brenda pak dekadave kaluam sfida të mëdha, kaluam transicione të shumëfishta, nga regjimi komunist në shpërbërjen e plotë të Jugosllavisë. Nga shtypja dhe okupimi në luftën për çlirim, nga një administrim ndërkombëtar i plotë në vetëqeverisjen demokratike dhe tani jemi në fund të rrugëtimin tonë për pavarësinë e Kosovës. Në fakt në vendin tonë kanë ndodhur mrekullia, brenda pak dekadave ne kemi kaluar sfida që vendeve dhe popujve të tjerë u janë dashur shekuj, por me këtë ndërrim rrethanash kanë ardhur edhe përgjegjësi të reja, prandaj jemi përballur me sfida si popull gjithmonë, kemi demonstruar dinjitetin dhe fuqinë tonë.

Me pavarësinë vijnë edhe sfida të reja, sfida për të cilat kemi marrë edhe përgjegjësitë që na takojnë, por një gjë është e qartë me pavarësinë vijnë edhe mundësitë e reja, me pavarësinë vjen krenaria, dinjiteti, vijnë ditë të reja, epokë e re nga e cila secili prej nesh kërkon më shumë punë për të arritur stabilitet, përparim, jetë më të mirë për qytetarët dhe vendin tonë.

Sot po vemë themelet e memorialit më të rëndësishëm dhe më madhështor për atë që kanë sakrifikuar bashkarisht, për ata të cilët kanë sakrifikuar jetën e tyre, por edhe duke respektuar sot ne vullnetin e qytetarëve të Kosovës, prandaj nga ne të gjithë sot kërkohet leadership dhe konsensus. Duhet të jemi shumë krenarë me përparimin që kemi arritur, por mbi të gjitha duhet të jemi krenarë që këtë rrugë e kemi bërë të bashkuar, të bashkuar si popull, por kemi ende punë për të bërë. E ardhmja do ta kujtojë dhe do ta shënojë atë që ne sot po bëjmë, do ta kujtojmë mënyrën se si jemi ballafaquar me sfidat para nesh, mënyra e vetme për t'i ballafaquar sfidat e së nesërme është duke qenë të bashkuar sot në deklarin tonë. Kemi besimin e palëkundur se të bashkuar mund të tejkalojmë çdo sfidë. Uniteti që ka mbizotëruar në mes të popullit të Kosovës dhe politikës në luftën tonë të drejtë ka qenë i palëkundur. Ky unitet i cili nuk ka qenë kurrë më i fuqishëm se sot, ky unitet i cili nuk ka qenë kurrë më i madh se sot është hap i madh dhe i sigurt drejt ndërtimit të shtetit tonë modern.

Veprimet e përbashkëta janë garancë për muajt dhe vitet që kemi para nesh. Uniteti sot është garancë që themelet e shtetit tonë të lirë dhe të pavarur të jenë themele stabile dhe të forta. Sot jemi të ftuar të punojmë bashkarisht, jo vetëm për një të ardhme më të mirë

në sferën e mirëqenies dhe të përparimit, por mbi të gjitha t'u sjellim vendit dhe qytetarëve tonë respekt, dinjitet dhe nderë. Por sot ne jemi të gatshëm të qëndrojmë në këmbët tona si një shtet i pavarur dhe sovran dhe partner i sigurt i botës demokratike. Ne jemi të gatshëm për t'u përballur me sfidat e reformave, me zhvillimin ekonomik dhe me procesin e modernizimit. Ne jemi të gatshëm dhe të përgatitur, kemi vullnet dhe energji që ta ndërtojmë infrastrukturën e nevojshme që Kosovën ta sjellim në shekullin 21 dhe në Evropë. Ne jemi të gatshëm dhe të përgatitur, por hapin e parë, të nderuar deputetë, duhet ta bëjmë sot. Qëndrojmë sot këtu krenarë me atë që kemi bërë për qytetarët dhe për vendin dhe mbi të gjitha me shpresë dhe në pritje për një të ardhme më të mirë për fëmijët tanë.

Të nderuar deputetë

Po fillon sot një epokë e re, epoka e premtimeve dhe e shpresës, epoka e paqes dhe e stabilitetit, epoka e mundësive të reja. Një epokë e re po fillon dhe ajo merr rrënjë nga vota jonë sot për Deklaratën e propozuar. Prandaj, të nderuar deputetë, ju ftoj të gjithëve që të votoni "po", votoni "po" në mënyrë që mund të hapim këtë kapitull të ri, Kosova vend i qytetarëve të Kosovës, votoni "po" në mënyrë që bota të na e dëgjojë qartë dhe zëshëm vullnetin e qytetarëve të Kosovës, votoni po me zë të bashkuar për propozimin për të ardhmen e Kosovës, "po" për partneritetin e Kosovës me botën Perëndimore. Kosova mirëpret dokumentin e presidentit Ahtisari. Kosova mirëpret prezencën civile ndërkombëtare dhe NATO-n, Kosova merr përgjegjësi për implementimin e marrëveshjes së presidentit Ahtisari, pra Kosova pret vendimin për Kosovën e pavarur dhe sovranë me deklarim tonë unik për Deklaratën e presidentit apo propozimin e presidentit Ahtisari. Faleminderit!

KRYETARI – Ju faleminderit. Ftoj z. Surroi të marrë fjalën.

VEËTON SURROI – I nderuari president Sejdiu, i nderuari kryeministër Çeku, i nderuari kryetar Berisha z. Thaçi, të nderuar ministra zonja dhe zotërinj, kolegë deputetë.

Është një nder i veçantë që këtu t'i ndajmë këto momente solemne së bashku, sepse ky rrugëtim me çfarëdo dallime të interpretuar në këto vite, megjithatë ka qenë rrugëtim i përbashkët. Ky moment koincidon me një moment para 8 vjetësh kur në këso kode Kosova filloi në formë dramatike partneritetin e vetë me bashkësinë ndërkombëtare. Atëherë Delegacioni i Kosovës në kushte të jashtëzakonshme, duke luftuar për jetë a vdekje nënshkroi partneritetin me bashkësinë ndërkombëtare dhe për herë të parë Kosova me Marrëveshjen e Rambujes u vu nën ombrellën mbrojtëse të aleancës më të madhe, më të fuqishme që ka njohur historia e njerëzimit të aleancës së NATO-s. Aso kohe, po ashtu, ndodhi një kthesë dramatike në jetën e Kosovës dhe të kosovarëve, për herë të parë në historinë e kësaj treve dhe të këtij populli Kosova u vu në vijën e drejtë të historisë, në vijën e cila fiton në histori. Asnjëherë më parë nuk kemi qenë në atë lundrim historik i cili veç shpinte drejt fitores.

Sot jemi në një situatë krejtësisht tjetër shumë më të mirë ekzistencialisht, të mbrojtur, por është pjesë e njëjtë e partneritetit të cilin e nënshkruam, ka të bëjë me zgjerimin e këtij partneriteti, ka të bëjë me zgjerimin e natyrës së këtij partneriteti dhe të pasojave që do të rrjedhin nga ky partneritet.

Vullneti i popullit të Kosovës për pavarësi nuk mbetet në këtë partneritet vetëm vullneti i këtij populli, por njihet si interes i botës demokratike. Ajo që ndodhi më 26 mars dhe ajo

që ndodhi dje në praninë edhe të kryetarit Sejdiu ishte në të vërtetë akti në të cilin vullneti i qytetarëve të Kosovës u shndërrua në pozicion të mbrojtur nga Perëndimi. dhe kjo ishte një kthesë e jashtëzakonshme për të gjitha ato vite dhe për të gjitha ato lëvizje që kanë çuar deri te kjo situatë. Në fakt ajo që ndodhi më 26 mars ishte njohja e së drejtës së shtetit të Kosovës për t'u bërë pjesë e bashkësisë së shteteve.

Në 100 vitet e kaluar, në tërë shekullin e kaluar u bë një përpjekje e jashtëzakonshme e shumë lëvizjeve, e shumë individëve e tërësisë për të qenë të barabartë. Kërkesa për barazi, për barazinë e Kosovës, të qytetarëve të saj, popullit të saj, posaçërisht u ritheksuan pas Luftës së Dytë Botërore. Ajo çka nuk u arrit në ish -Jugosllavi që Kosova të jetë e barabartë me popujt e tjerë po mbërrihet sot zonja dhe zotërinj Kosova po shndërrohet në shtet të barabartë me popujt e tjerë në një bashkësi të lirë shtetesh, në një botë krejtësisht të re. Njëkohësisht sot është nderë që çështja e Kosovës të jetë shndërruar në çështje që bashkon Shtetet e Bashkuara të Amerikës dhe Bashkimin Evropian, çështje që bashkon edhe ato shtete brenda Bashkimit Evropian të cilat mund të kenë pasur dyshime, çështje e cila bashkon kulturat e ndryshme, bashkon shtetet e krishtera, ato islamike, ato me sfond budist. Kosova është çështje globale po i bashkon të gjitha këto vende dhe të gjitha ato lëvizje të cilat kanë qenë lirisht dhe të cilat kanë krijuar shtetet e veta

Ajo që bëjmë ne sot, propozojmë që të bëjmë një deklaratë është vetëm të theksojmë se ky Kuvend i Kosovës, se kjo Kosovë është e gatshme për zgjerim të këtij partneriteti në këtë shekull, në këtë bashkësi të lirë shtetesh. Ju faleminderit.

KRYETARI – Ju faleminderit z. Surroi.

Të nderuar deputetë. Më lejoni që ta lexoj tekstin e deklaratës të hartuar dhe të harmonizuar mbrëmë nga Kryesia e Kuvendit të Kosovës dhe anëtarët e Grupit të Unitetit dhe nga shefat e partive politike.

Deklaratë e Kuvendit të Kosovës në mbështetje të Raportit dhe Propozimit Gjithpërfshirës për statusin e Kosovës të Martti Ahtisaarit, të dërguarit Special të Sekretarit të Përgjithshëm të OKB-së.

Kuvendi i Kosovës, përmes kësaj deklarate mirëpret raportin final të të Dërguarit Special të Kombeve të Bashkuara për procesin e statusit të Kosovës, të paraqitur nga Sekretari i Përgjithshëm i Kombeve të Bashkuara në Këshillin e Sigurimit të Kombeve të Bashkuara më 26 mars 2007, duke besuar se rekomandimet e tij paraqesin një zgjidhje të drejtë dhe të balancuar, që është në përputhje me vullnetin e popullit të Kosovës.

Pranon dhe zotohet të implementojë plotësisht Propozimin gjithëpërfshirës të marrëveshjes për statusin e Kosovës, të paraqitur nga Sekretari i Përgjithshëm i Kombeve të Bashkuara në Këshillin e Sigurimit të Kombeve të Bashkuara më 26 mars të vitit 2007 dhe deklaron, nën supozimin që Marrëveshja është e pranueshme për Këshillin e Sigurimit, se dispozitatat që i përmban marrëveshja do të jenë ligësisht të obligueshme për Kosovën.

Mirëpret pa rezervë praninë ndërkombëtare civile dhe të sigurisë që do të krijohet në Kosovë, siç parashihet në Marrëveshje dhe zotohet se do të bashkëpunojë dhe do ta mbështesë këtë prani në çdo mënyrë të mundshme, përderisa kjo prani ndërkombëtare civile dhe e sigurisë t'i kryejë detyrat që i janë dhënë në Marrëveshje.

Prishtinë, më 5 prill 2007

Fjalën e kërkon z. Baliq.

Të lutem, rendi i ditës është harmonizuar mbrëmë dhe është caktuar rendi i ditës për këtë mbledhje. Nuk ka pikë tjetër..

Kush është për deklaratën? Ju faleminderit.

Kush është kundër?

Konstatohet se njëzëri miratohet Deklarata e pakos së Ahtisarit me një votë kundër.

Ju faleminderit.

Me kaq përfundojnë punimet e kësaj seance.